



EDITOR:
Bonaire Communication Services N.V.

Djârason 2 novèmber 2022 | Preis:\$1.00

FALTA DI SERIEDAT

Dòbel arko íris despues di yobida



Un siudadano a kompartí e foto aki ku BONERIANO, pa kòrda nos ku despues di kada yobida naturalesa semper ta kumpli. Sea ku fruta òf berdura, paisahenan bèrdè òf manera den e kaso aki, un bunita arko íris.



Abogado boneriano diskriminá

KRAENDIJK- Un abogado ku ta registrá na Boneiru no por atendé kasonan den kasashon na Korte Supremo na Den Haag. Tin abogado ku ta konsiderá esaki komo diskriminatorio mirando ku for di 10-10-

10 nos ta parti di Hulanda. Un abogado mester sigui un edukashon spesial pa kasashon i banda di esaki e mester ta registrá na Hulanda pa por ehersé e tarea aki den Korte Supremo.

Un abogado boneriano a

entamá un kaso kontra Estado Hulandes, pues kontra ministerio di Hustisia i Seguridad. E ta pidi Korte den Promé Instansia pa permiti abogadonan boneriano pa atendé kasonan sivil den kasashon, mirando ku e

situashon aktual ta diskriminatorio. Korte a rechasá esaki.

Lei di Abogado

Na Boneiru, Lei di Abogado BES ta vigente miéntras na Hulanda ta sigui Lei di Abogado.

Un di e diferensianan notabel, ta ku den e Lei di Abogado BES falta e eksigensia di entrenamentu i edukashon. Ademas no tin supervishon pa ku esaki. Miéntras ku e lei di Hulanda ta eksigí preparashon kontinuo di un abogado.

E punto aki por konsiderá komo garantia di e kalidat di e abogado. Miéntras ku nos isla no konosé e garantia aki. Sigur un asunto kuestionabel, mirando ku por konkluí ku segun Korte, nos abogadonan no ta sufisientemente ekipá ku konosementu pa atendé ku kasonan den kasashon.

Korte den Promé Instansia a dikta na favor di Estado pues kontra e abogado boneriano.

El a apelá e sentensia, ta interesante pa sa loke Korte di Apelashon lo disidí.

Lei pa un, lei pa tur

KRALENDIJK- Agentenan polisial ta demonstrá ku ta lei pa un i lei pa tur. No solamente durante buskamentu di pampuna nan a persistí pa no transportá personanan den baki di pikòp. Por a nota djamars 1 di novèmber na momentu ku agentenan a para shofùr di un pikòp pa kontrol i a indiká ku no por transportá pasahero den e baki.



Tur loke ta payroll i HR den bo plant'i man!

www.payrollprohrm.com



GET IT ON Google Play | Download on the App Store | Payroll Pro

NosTV a despedí di Tino de Palm

KRALENDIJK -- Djasabra último den un ambiente ameno na Maiky Snèk, koleganan di NosTV a para ketu na e echo ku entrante promé di novèmber kolega Tino de Palm ta sigui pa un reto nobo den su karera.

Koleganan a bini huntu i a papia di e kolegialidat ku tin un pa ku otro. No un tim,

sino un famia. Momentunan di strès te na momentunan di alegría i goso huntu, despues di kada proyekto kristalisá. Despues di a saboriá un plato krioyo sukulento, a hasi entrega di un sertifikado di apresio na Tino. Esaki tabata un sorpresa pe. Riba e sertifikado tin e siguiente teksto:

“Bettino ‘Tino’ de Palm, un kolega ku a mostra su profeshonalismo i pashon pa e trabou di periodismo, ku a sa di motivá i pusha tur su koleganan di NosTV. P’esei nos no por lagá bo bai sin mostra e apresio grandi ku nos tin pa bo komo profeshonal, kolega i amigu. Tur kos bon pa futuro.”





Ayera tantu bes mi a kumin-
sá skirbi algu pa e rúbrika
aki i mi tabata kit'é bèk, mi
no tabatin un idea kiko mi
skirbi i riba dje mi ta mira
ora ta bai. Mi tin ku buska mi
yu for di 'opvang', pues mi
ta kere ku mi tin ku bai bin
bèk i sigui skirbi. Mi tin ku
pensa un otro strategia pa
por skirbi p'e kolumna aki,
mi ta kere ora mi ta kant'i
laman, drumi riba kama òf
hasiendo algu otro den mi
tempu liber pa mi skirbi. Ya
asina mi no ta keda skirbi
tokante di trabou.

Mi por ripará ku awor ko-
rant falta DJ so pa e por
bai, ya kaba Velly a bin
puntra mi kiko mas falta i
Netty ta bin para band'i mi i
ta keda wak. Mi sa bon bon
e ke bisa mi kiko tur mester
kambia den e korant, pero e
no por bisa mi pasobra e ta
mira ku mi ta okupá. Awor
ta e ku Velly ta wardando
riba mi, normalmente ta ami
ta warda riba nan. Nan ta
hasi drùk, mi tin gana di sa
si nan a manda tur loke ku
tabata falta. Mi tin gana di
bira 'savage' manera Maya
a hasi último i manda 300
palabra so i lanta bai, Netty
mester a kaba di yena e rú-
brika p'e. Di mes Maya ta
bai kas for di 3'or, na final
ora ku a bai pa pone MB
a ripará ku e no a yena ni
mitar.

Miéntas Velly ku Netty ta
wardando riba mi, nan a
bira masha kreativo, mi ta
tende nan ta bin ku idea
pa kambia sierto kosnan
den kantor. E ta zona ma-
sha 'great', nan tin pensá di
hasi mi kantor un kaminda
pa nos por bin nos tur hunt
i pone mi den kantor serka
Papi i Netty. Mi por bisa ku e
idea no ta zona asina malu.
Ban wak ki dia e cambio lo
bin. Ya asina mi no ta sinta
mi so mas.

Bueno, e hendenan aki ta
blo buta preshon riba mi,
danki Dios mi a yega e kan-
tidat di palabra ku mester
yega, Velly no ta laga mi
hala un rosea "ta un tehiiii"
manera e mes sa bisa.

Pa atendé asuntunan di pueblo

FALTA DI SERIEDAT

KRALENDIJK – "Tur
hende ku ta sigui reunion
di Konseho Insular, òf ta
tuma nota di esakinan via
medio sosial, mester ta di
akuerso ku mi, ku e ak-
tual gobernashon, sostené
pa e koalishon UPB/MPB,
no ta atendé asuntunan di
pueblo ku seriedat. Ta mal
usá nan mayoria pa pasa tur
loke nan ta kere i no ta tene
kuenta ku loke kasi mitar di
representashon di pueblo ta
trese dilanti komo krítika
konstruktivo, òf aporte di
idea na interes di pueblo en
general." Esaki di akuerso
ku Daisy Coffie di Frak-
shon Coffie.

Ningun splikashon

Tratamentu di presu-
puesto ku ta e dokumento
mas importante di gober-
nashon di nos isla ta ser
aprobá sin ku gobièrnu ta
splika pakiko nan no a usa e
fondonan ya aprobá ni tam-
poko ta splika dikon tin ku
usa fondonan for di reserva
pa bin ku proyektonan sin
ningun splikashon i/o hus-
tifikashon.

Den e último reunion
por a konstatá ku no ménos
ku 44 persona a keda tumá
den servisio di gobièrnu
riba e asina yamá OVO,
ku ta un kontrato di trabou
spesial pa hasi sierto tarea
den e aparato. Ta konosí ku
un hende riba OVO ta risibí
tres biá e montante na sala-
rio ku un empleado ku tuma
den servisio di gobièrnu sea
riba un kontrato pa tempu

definí, òf sea den servisio
permanente ta gana. Pa
kolmo no ta buska yunan
di tera pa okupá e funshon-
nan akí, pero mas ku 90%
ta hulandes oropeo, segun
Coffie.

Imposibel

Coffie ta sigui, miran-
do e tempu ku koalishon
a proponé i akordá pa a-
tendé presupuesto, esta 5
minüt, tabata imposibel pa
por a trese mas detayá en-
tre otro e asuntu akí dilanti.
Djarsars sí CFT duna su
konseho riba e kambionan
ku Frakshon Demokrat a
entregá, lo mester bai biba
atrobe ku koalishon lo vota
na fabor di e presupuesto
ku tur e defisiensianan ku
esaki tin.

Coffie: "Despues di a
konsultá interno, mi ke in-
formá pueblo ku ami lo
no por bai di akuerso ku e
presupuesto presentá i mi
ta evaluando ku sí mi mes-
ter bai e reunion ei mes.
Banda di tur esaki, ainda
tin riba mesa tres rapòrt ku
mester trata, esta Chogogo,
rotònde i BonLab. I no lu-
bidá ku e vupá ku koali-
shon a kometé pa loke ta e
moshon ku mester a inve-
stigá e papel di gezaghèber
tambe a keda tapá awor ku
e santu ilegal ku e mesun
Chogogo a basha kantu di
laman.

E gobièrnu akí a pèrdè
kredibilidat i koalishon ta
kere ku mal usá nan ma-
yoria, lo pone ku pueblo lo
lubidá e mal gobernashon

akí."

Biahe pa Hulanda

Djarsason su frakshon,
di akuerso ku Coffie, tam-
be ta forma parti di e del-
egashon ku ta bai Hulanda.
Di su banda e ta bai ku dos
mishon, esta konvensé Mi-
nisterio di VWS ku Boneiru
mester tin dos laboratorio,
opviamente ku kontrol di
akreditashon pa ku e nivel
di servisio ku e ta duna. E di
dos mishon ta pa konvensé
Minister Carola Schouten i
buskando den esaki sosten
di miembronan di Tweede
Kamer pa introdusí e míni-
mo sosial si ta posibel en-
trante promé di yanüari
2023 i no warda te 2025.

Banda di esaki, Coffie ta
sigui, e lo hasi esfuerso pa
sostené diputado Nina den
Heyer pa logra ku akohida
di mucha lo bira komple-
tamente grátis. Tambe e lo
trata na hiba kòmbersashon
ku ministerio di enseñansa
pa loka ta studiantenan di
Boneiru ku ke studia pafó
di Hulanda por bin na re-
marke pa finansiamentu.
"Lo mi probechá di e
okashon pa sondia unda tin
fondonan supstansial relas-
honá ku konmemorashon di
500 aña Rincon pa yega na
un bon sentro pa enkuen-
tronan sosial, deportivo i
kultural den Rincon," Cof-
fie ta trese dilanti.

DIA DI TUR DIFUNTU 2 di Novèmber 2022

**"Señor ta drecha un mesa pa nos
den bista di nos enemigu ..."**
(cf Salmo 23,4a)

Nos sa pidi Dios pa E skapa nos di prueba. Pero Dios
hopi biaha ta pèrmítí nos pasa den prueba tòg, meskos
ku e tres amigunan di Daniel. Dios a pèrmítí rei tira nan,
mará den fòrnu di kandela. (cf Daniel 3,19ss)

Despues Dios a saka nan ileso for dje fòrnu. (cf Dan 3,27)
Nebukadnèsar a sklama: "Bendishoná sea Dios, ku a
manda su angelnan salba su sirbidónan." (cf Dan 3,08ss)
Di mes manera Señor ta pèrmítí nos tambe pasa den
prueba, pa despues "E drecha un mesa pa nos den
bista di nos enemigu." (cf Salmo 23,4a)
Awe nos kerido defuntunan tambe ta sintá hunt ku
Señor, na mesa di e Bankete Selestial.

**Danki Señor, ku bo bendishon i bondat
ta kompañá nos tur dia di nos bida.**
(cf Salmo 23,6)

1L Sab 3,1-9; Salmo 23,1-6; 2L Rev 21,1-5; Ev Mt 25.31-46

005999-522-4056 Un Snehil Pan unsnehilpan

BESCHIKKING

Bij beschikking van het Gerecht in Eerste Aanleg van
Bonaire, Sint Eustatius en Saba, zittingsplaats
Bonaire **dd 13 september 2022 (BON202200252)**
is onder curatele gesteld **Jenny Amanda SILBERIE**,
geboren op 1 oktober 1986 te Santo Domingo, met
benoeming van **Ana Hilda POLANCO ROSARIO**,
geboren op 12 juni 1949 te San Pedro de Macoris
(Dominicaanse Republiek) **tot curator.**

Komishon konseho keho pa kuido i hubentut

KRALENDIJK -- En trante promé di novèmber a instalá un komishon di konseho tokante keho independiente i eksterno pa duna konseho riba evaluashon di keho di habitantenan di Hulanda Karibense relashoná ku kuido òf kuido di hubentut.

Kuido i Kuido di Hubentut Karibe Hulandes, ZJCN, di ministerio di VWS, ta responsabel pa kuido i kuido di hubentut na Karibe Hulandes. ZJCN ta konsiderá importante ku ta atendé keho di habitantenan kontra ZJCN di forma kouteloso. E aktual funshonario di keho di ZJCN ta atendé tur keho ku drehta. E funshonario di keho ta wak sí e

keho ta atmisibel i lo tuma e keho komo tal den tratamentu.

Entrante promé di novèmber lo hasi un agregashon importante na e prosedura di keho eksistente. Den algun kaso por pidi e komishon di konseho tokante keho independiente, pa duna konseho riba evaluashon di un keho.

ZJCN ta konsiderá nesesario ku e komishon di konseho tokante keho ta bon na altura di e situashon riba e islanan i nan habitantenan. Pa e motibu ei ta preferá pa e miembronan di e komishon ta bin di e region, di manera ku nan konosé e kultura i sirkunstansianan di Karibe Hulandes.

A publiká un vakatura riba kua personanan por a reashoná. Finalmente a selektá 5 miembro ku Sekretario di Estado di VWS a nombra. E miembronan ta presidente F. Goedgedrag, anterior gobernador di Antia Hulandes, presidente suplente D.C. Kramp, miembronan A. McKenzie-Tatem, P. Perigault Monte i M. Molenaar.

Ningun di e personanan akí no ta traha na ZJCN, nan por konsehá kompletamente independiente. E nombramentu ta na vigor pa un periodo di 4 aña, ku posibilidat pa prolongá e periodo akí dos biá. E komishon mes ta determiná su forma di traha. Denter di poko ta publiká un reglamentu den kua ta stipulá esaki. ZJCN ta suministrá sí e sekretario ofishal, ku ta sostené e komishon di keho.

Ki ora ta pidi yudansa

Ora ZJCN risibí un keho pa kua ta pidi un evaluashon, e por pidi yudansa di e komishon di konseho tokante keho. E direktor di ZJCN ta disidí ki ora ta pidi e komishon pa atendé un keho pa duna konseho.



No t'asina pues ku e denunsiante mes por skohe pa e komishon di konseho tokante keho atendé su keho.

Ora e komishon di konseho tokante keho atendé un keho, e lo organisá un oudiensi. Durante e oudiensi akí e komishon lo skucha denunsiante i akusado. Despues ku e komishon a kolektá informashon

di e forma akí riba e keho i e defensa kontra esaki, e lo emití un konseho. E ta manda e konseho akí pa e direktor di ZJCN. E direktor konsekuentemente ta disidí riba e keho. E denunsiante ta risibí un karta al respekto, den kua ta inklui tambe e konseho di e komishon di konseho tokante keho komo anekso.

Waha di morto hopi spesial



Agensia funerario 'Nos Consuelo' pa algun tempu kaba tin un waha di morto hopi spesial. Un waha no halá pa kabai, sino propulsá pa un motor. Te ainda mester kustumbrá ku e waha. E foto ta musta e dos rumannan Leroy i René Sedney kondusiendo e vehíkulo spesial akí riba Kaya Korona, hibando un defuntu pa su último lugá di sosiegu.



Programanan di Bonaire.tv

TELBO kanal 70

Flamingo TV kanal 23

Djárason 2 novèmber 2022

12.00 Herensia:
13.00 Aki Aruba:
14.00 Herensia:
15.00 BAPA:

Ini Statia
Clifford Rosa
Seferina Rogelia Domacassé-Winklaar
Edsel (Anuar Statie) Plaate (Islam)

16.00 Programa
17.00 Aki Saba:
18.00 Herensia:
19.00 BAPA:

Politiko MPB
Carl Buncemper
Antonio Sint Jago (Isla Falkon)
Isaac Romualdo Coffi -
Eusebio (Cheba) Soliano

20.00 Aktualidat:
21.00 Aki Boneiru:
22.00 Herensia:
23.00 Sitionan

Stanley Balentin
Jandino Asporaat
Mama, Pana & Raymunda (Kurandero)
Marka: Awa di Lodo i San Jose

Tur mèrdia 12'or ta kuminsá un programashon nobo di 4 ora.
E programashon aki ta ripití pa 24:00.

Coral Casino Bonaire

ta buska

DEALERS 21+

- *Coral Casino por duna training tambe pa por siña bira Dealer
- *Aplikante mester ta den posishon di un pasport hulandes
- *Mester por dominá e idiomanan: papiamentu-ingles-hulandes i spañó
- *Mester por presentá papel di Bon Kondukta.

Pa mas informashon por pasa personalmente na Coral Casino durante orario di ofisina di djaluna pa djabierne entre 8'or mainta pa 5'or atardi.

Segun èks direktor Dortalina

Na vários okashon Bonlab mester a defendé su mes

KRALENDIJK—“Na vários okashon Bonlab mester a defendé su mes kontra atakenan di Hulanda”. Rignald (Yonchi) Dortalina ta relatá esaki den e programa AKTUALIDAT. Den un entrevista ku Boi Antoin, el a splika di e preshon ku Hulanda a pone hasi e laboratorio parti di Fundashon Mariadal (FM). Por bisa ku basta ta e atakenan ku Bonlab a sa di defendé su mes kontra di dje. Rapòrtnan ku no ta kuadra, inspekshon ku a kana dren-ta sin previo aviso, djis pa menshoná algun.

Dortalina a amplia riba e manera kon a pone su persona di un dia pa otro riba ‘non-actief’. “Tabata

un eksigensia di entre otro inspekshon pa Bonlab ta akreditá. Trahando riba esaki tras di mi lomba tabatin un grupito tabata hasi tur nan posibel pa kita mi. Mi a bai sera konosí ku e sekretariado nobo di Bonlab, ku tabata konsistí di un hurista di Kòrsou, un hulandes oropeo bibá na Kòrsou i unu di RCN. Yen entusiasmo mi a konta di Bonlab i kon ta bayendo. Despues a bisa mi ku tin yen ‘ruis’ i nan ta bai inisiá un investigashon i ku mi mester bai riba ‘non-actief’. Asina e kos a kuminsá, sin base sin nada”. Dortalina ta splika ku niun di e persona nan aki nunca a dreña ni konosé Bonlab, i e mes no sa ken



nan ta. Pero sí nan a yega riba promé dia i skòrs e. Mas aleu riba mesun dia di e notisia, e grupo a bini bèk serka Dortalina parti mèrdia. Huntu ku nan, un kompania forénsiko ku e kita kòmputar, telefòn, yabi etc. for di dje. El a kompará esaki manera ora ta trata kriminal. Na su konsepto tur esaki tabata planiá delantá. Riba esaki Antoin ta puntra e èks direktor si kisas ta malkontentu di e trahadónan a pone ku esakinan

a koperá pa kita su persona. E ta splika ku semper lo bo keda haña trahadó malkontentu na trabou. Especialmente si bo ta okupá ku un akreditashon ku por enserá redusí personal. “Algun dia promé ku e suseso, James Kroon i Elvis Tjin-A-Sjoe a invitá mi pa kombersá. Nan a ofresé mi un trabou na LVV. Den promé instante mi no por a komprondé dikun, pero despues mi a bin realisá tur kos”.

A kore ku e èks direktor netamente den periodo di Covid. Segun su splikashon tabata un momentu hopi krusial mirando e krisis a kuminsá eksigí bida di siudadanonan. Mas aleu e ta sigui bisa ku Bonlab a pèrdè

oportunidat grandi di a profilá su mes. E ta referí na e parti molekular ku ta Bonlab so por a hasi. Despues ku a pone riba ‘non-actief’, e no sa mas kiko a para di e proseso aki. “Imposibel ku ta laga tur tipo di kompania bini i hasi tèst di Covid i gobièrnu tin un laboratorio ku e no ta hasi uzo di dje”.

Por último Dortalina ta lamentá ku kosnan a bai di e forma ku nan a bai i ku a uza un boneriano, den kaso aki Ben Oleana, pa ‘kita su kabes afó’, i ku esaki tabata ‘in opdracht van’.

“Un kos ta sigur, si Bonlab no haña un kontrato di kuido, e lo no por keda eksistí”, e ta finalisá bisando.

Sentral durante bishita Gezaghebber Rijna na Bruselas

Proyekto Galileo i konsulta tripartit

KRALENDIJK -- Gezaghebber Edison Rijna a dediká su biahe di trabou spesialmente na e proyekto Galileo pa Boneiru i e konsulta tripartit ku a tuma lugá

siman pasá na Bruselas.

Na Boneiru den e tempu binidero ta bai konstruí un stashon di sènsor pa Galileo. Galileo ta e sistema mundial sivil di nabe-

gashon via satélite di Union Oropéo den kolaborashon ku e organisashon oropeo di nabegashon espasial, ESA.

Establesimentu di e stashon akí na Boneiru ta trese posibilidatnan duradero di desaroyo ekonómiko kuné, entre otro pa negoshinan ku ta inisiá i empresanan teknológiko.

Gezaghebber Rijna a laga Directorate General for Defense Industry and Space (DG DEFIS) i Directorate International Partnerships (DG INTPA), dun’é mas informashon tokante e oportunidatnan akí. Banda di esaki el a hasi un bishita na e Space Forum ku a tuma lugá na Bruselas durante e siman ei.

Den e periodo binidero, e ofisina internashonal ku resientemente a aña di Gabinete di Gezaghebber ta papia tokante e oportunidatnan akí, konhuntamente ku e partnernan i lo konse-



há Kolegio Ehekutivo mas aleu tokante esaki.

Djamars Gezaghebber a partisipá na e konsulta tripartit entre Komishon Oropéo, e estadonan miembro Hulanda, Fransiá i Dinamarka i e paisnan i teritorionan ultramar.

E konsulta tripartit akí tabata dediká partikularmente na e preparashonnan pa e konferensia ministerial na fin di luna di novèmber na Nueva Caledonia. Komo ekstenshon di esaki, Gezaghebber a tene vários

kombersashon bilateral ku representantenan di e otro islanan.

Riba agènda tabatin tambe un momentu di sera konosí ku e direktor nobo pa Amérika Latino i área karibense di Directorate International Partnership, Felix Fernandez Shaw.

Gezaghebber Rijna a finalisá su programa di trabou na Bruselas ku un bishita na e representashon permanente di Hulanda na Bruselas.



Rotary Club Bonaire ta alegrá grandinan

KRALENDIJK— Resientemente grandinan di e proyekto di hòfi kultural, Kompañá nos Grandinan a risibí un bunita gesto. Rotary Club Bonaire a opsekiá un montante di kua e organisashon por a hasi aktividat ku e grandinan.

Den e luna nan ku a pasa e grandinan a keiru i hasi akitivitatnan huntu ku nan 'buddy'. BonTuk. Luna nan ku a transkuri tambe e grandinan tabata hopi aktivo. Un 'buddy' ta un boluntario ku ta kompañá e persona di edat ku entre otro aktividatnan sosial.

Nan a bishitá entre otro saliñanan di salu, Chacha-

cha Beach i algun sitio mas ku e grandinan tin hopi tempu sin bishitá. Despues di paseo, e duonan a pasa dal un kos di smak na Gio's i tambe Karel's Beach. Tur esakinan, danki na e gesto di Rotary Club Bonaire. Den luna nan benidero tin mas aktividat planiá.

Boluntario

E proyekto Kompañá Nos Grandinan ta di Hòfi Kultural ku ta forma parti di Fundashon Plataforma Kultural. A inisiá e proyekto na 2020. Meta di e proyekto ta pa konektá e grandi ku un boluntario ku na su turno ta kompañá e grandi. E en-

foke mas grandi ta bai na e grandinan ku ta so, no ta mobil òf kasi no tin famia mas. Tur siman e grandi ta risibí bishita di e boluntario, kende na su turno ta hasi un aktividat ku e grandi. Esaki por varia for di lesa buki, obra di man, kombersá òf bai di bishita. Aktualmente e proyekto ta konta ku 12 partisipante.

Mieneke van Rossem ta lider di e proyekto. El a duna di konosé ku tin espasio pa mas boluntario. Por



tuma kontakto ku Mieneke na 786-4233. Boluntario- nan ku ta papia papiamentu

i hulandes ta kordialmente bonbiní. Riba foto e grandinan i nan 'buddy'.

Kana den lodo pa yega dòkter

KRALENDIJK

-- Djaluna mainta tempran pashèntnan di dòkter na klínika Sentro Médico Sùit na Tera Kòrá mester a pasa den lodo pa yega serka dòkter pa konsulta. Un situashon fastioso ku ta rekeri atenshon ya pa hopi aña.

Plas grandi di awa nèt di-

lanti di e klínika, kana den lodo pa por yega serka dòkter. BONERIANO a mira kon un mama hóben ku yu den kargadó bulando plas di awa i lodo pa e dreña e klínika ku tur e konsekuensia. Un situashon no aseptabel na e klínika.

Tur esaki promé ku e avalancha di awa ku a kai riba e dia parti mèrdia. Di mes el a bira pió despues. Esaki ta un situashon ak-

tual dilanti i den bisindario di klínika di dòkter na Tera Kòrá. Otro kos ku ta un problema na e klínika, praktikamente no tin niun lugá pa stashoná den e área pa bai dòkter. Òf mester stashoná leu i sí ta trata di un hende enfermo, ta mas molèster pa yega dòkter ku keda kas. Simplemente mester buska un manera ku e situashon rònt di e klínika di dòkter na Tera Kòrá.



Plenchi di Trabou ta duna fruta




Bon inisiativa di Plenchi di Trabou spesial hóben i adulto lokal ta dunando fruta na Boneiru. Un grupo a sigui kurso di bartènder i a slag a risibí nan sertifikado. Plenchi di Trabou a organisá e kurso i Moving Forward a kordiná esaki duná dor di Kelvin Ventura di Umbrella.



Mensaje de la Virgen Maria Reina de La Paz desde Medjugorje 25 de Octubre de 2022

"Queridos hijos, el Altísimo me permite estar con vosotros, y ser vuestra alegría y camino en la esperanza, porque la humanidad se ha decidido por la muerte. Por eso Él me ha enviado a enseñaros que sin Dios no tenéis futuro. Hijos míos, sed instrumentos de amor para todos los que no han conocido al Dios del amor. Testimoniad con alegría vuestra fe y no perdáis la esperanza en el cambio del corazón humano. Yo estoy con vosotros y os bendigo con mi bendición maternal.

¡Gracias por haber respondido mi llamado!" 10/25



EDITORIAL

Hende straño riba isla loko!

Kasi 50 aña pasá Henk Klomp, un polis penshoná ku a traha na Boneiru i Kòrsou, a skirbi un seri den e korant Amigoe titulá 'Strange People in a Crazy Harbour'. Den e seri aki e tabata deskribí situashon, kaso i hende straño ku e tabata topa den su trabou komo polis riba e dos islanan aki. E título di e seri aki, un tiki adaptá, ta kuadra pa Boneiru: 'Hende straño riba un isla loko'. Nos ta biba riba un isla na unda tin krítika riba práktikamente tur kos. No tin ún kos ku bo hasi, òf keda sin hasi, ku no ta motibu di diskushon i krítika riba e isla aki.

Un ehérsito di 'eksperto' pará na banda, kapitannan riba waf sin niun papel, pa kritiká tur kos. Nan kampo di bataya ta spesialmente e plataforma di media sosial, kaminda nan ta hungá tòf, hunga sabelotodo, ataká, lastra i ridikulisá tur esnan, ku bon intenshon, ku riska kontrarestá nan ponensianan fofo.

Tuma por ehèmpel asunto di waf di kònteiner. Añanan kaba ta papiando riba un haf ku por akomodá barkunan ku ta transportá kònteiner. Ta opvio ku deskargamentu di kònteiner no por sigui tuma lugá den haf di Kralendijk. Esei sí mayoria ta di akuerdo kuné. Riba e sitio na unda e haf nobo mester bini tin diskushon, hopi biá sin pia i sin kabes. Blablabla den óptima forma!

Ta yen di alternativa a bini pa loke ta trata lokalidat pa e haf aki. Pariba di Punt Vierkant, banda di aeropuerto (Te Amo Beach), kosta di Karpata, Saliña di Tam (idea di Robby Beukenboom), kosta di Hato. Esaki na final a bira e sitio definitivo.

Manera por a spera, diskushon a start. 'Ekspertonan' a sali fo'i

kueba. Den e diskushon aki a sali un persona, Erik Soleano, ku a dal e martin riba e klabu. El a duna un reakshon bon raspá riba su kuenta di facebook.

Erik a skirbi: "Ami ta mira hopi komentario i ta puntra mi mes: Kisas mester pone un referèndem pa tur hende por vota ta unda nan ke pa pone e haf di kòntainer? Ami ta honesto: unda ku pone e haf aki, nunca tur hende lo ta kontentu.

Dor di e karakter hodidu aki mes nada no por tuma lugá na drechi na Boneiru."

Erik ta sigui: "Tur hende ke tur kos, pero den mésun rosea nan mes ta oponé kontra tur kos.

Awèl, ami ta bisa, laga kada ken traha nan haf den nan kurá di kas anto, pasobra tòg no ta bon pa trah'é kaminda ku a proponé aworakí."

Erik ta konkluí ku un punto ku nos a kuestioná resientemente den un komentario, esta ku hende ta sali kritiká tur kos, pero no ta ofresé e solushon. Na unda sí por traha haf di kònteiner?

Erik: "Sali bisa unda sí por traha e haf di kònteiner. Ta kritiká ku no ta tuma desishon, pero ora sí tuma desishon, pa sierto hende nunca tampoko no ta bon.

Mi a yega di bisa i no ta kansa di repetí: si bo mes no sa kiko bo ke, otro lo duna bo loke ku bo no ke!"

Pabien Erik. Si tur hende ta pensa manera bo, Boneiru lo no tabata un 'crazy island' ku 'strange people', pero un isla próspero den futuro!



Bo mester di ayudo pa paga kuent'i koriente òf Pagabon? Direktorado di Komunitat i Kuido por yuda bo pa kubri e gastunan akí.

Di djárason 2 di novèmber te ku djamars djasabra 5 di novèmber 2022, bo por hasi un petishon den bo mes bario.

Riba www.bonairegov.com bo por lesa tokante e kondishonnan i e dokumentonan ku bo mester entregá.

	Nort'i Saliña	Sentro di bario	Djárason 2 di novèmber	17:00–20:00
	Antriòl	Plasa Chicu Goeloe	Djaweps 3 di novèmber	17:00–20:00
	Playa	Jeugdhuis Jong Bonaire	Djasabra 5 di novèmber	09:00–12:00
	Amboina	Sentro di bario	E siman akí no tin ora di konsulta	
	Rincon	Cocari	E siman akí no tin ora di konsulta	

Bo tin pregunta? Yama òf app 701 1055 òf mail koriente@bonairegov.com

Esaki ta un mensahe di Direktorado di Komunitat i Kuido

SKLAMA NA SEÑOR, YAMA RIBA SU NÒMBER!

"Sklama na Mi, i lo Mi kontestábo, i lo Mi mustrabo kosnan grandi i poderoso ku bo no sa." Jeremias 33:3(BS)

Sklama na Señor, bisa Señor ku sinseridat di bo kurason, ku bo tin mester di djE, pa yuda bo, guia bo, saka bo for di e situashon atverso ku bo ta den.

Pa kambia bo i transformá bo di paden bin pafó.

Pa kambia bo manera di pensa i laga E guia bo den loke bo ta pensa ku ta segun Su palabra.

Sklama i sklama pa salbashon di bo alma, si ainda nunca di bèrdat bo a rekonosé dilanti di Dios, ku bo ta un pekador i ku Kristu Hesus ta stima bo i a bin na mundu pa salba bo i duna bo bida eterno. Juan 3:16

Na momento ku bo sklama ku sinseridat di bo kurason i ta dispuesto pa obedesé Dios, seguramente lo bo eksperensiá Su poder den bo bida.

Lo bo mira Su maravianan den bo bida, lo bo mira kosnan grandi sosodé den bo bida, bo famia, bo yu(nan), bo trabou i den bo sirbishi pa Señor.

Tur esakinan mi ta bisando ku firmesa i siguridat i ku mi kurason yen di gratitut, pasobra nan ta loke mi a eksperensiá. Mi no tin palabra sufisiente pa yama Señor danki pa tur loke El a hasi, ta hasiendo i lo sigui hasi pa mi. Ta kosnan masha grandi, maravioso mi a risibí di mi Señor, mi Salbador i Rei di mi bida, ora ku mi a sklama na djE ku un kurason umilde i dispuesto pa skucha Su bos, obedes'É den tur loke E ta bisa mi pa medio di Su Palabra. Diannenara Mercera

Produkshon PGM

SOLUSHONNAN 7 ESTATAL NOBO

UN FEDERASHON MAS PERFEKTO

Desepshon òf mal komprondementu?

Estádos Unídos di Merka semper ta aspirá pa yega na un 'Union mas perfekto'. Nos tin ku kopia esei. Pero nos aspirashon mester ta pa bira un federashon mas perfekto. Pasobra loke nos tin awor ta un kos bruá.

Nos ta insistí ku di naturalesa e kos bruá ku nos tin, ta federativo. Esei tabata e intenshon original tambe. Pero den práktika i den diferente artíkulo di Statút, e ta unitario, federal i kon-federal tur bruá. Por ehèmpel, ta yama e 4 partner den Reino 'pais'. Pero, ounke e 3 partnernan Karibeño mester ta algu, sigur ta ku niun di nan no ta un 'pais'.

Bo ta den duda? Pasobra Statút mes ta yama nan 'pais'. Tur hende ta yama nan 'pais'. Pues nan mester ta 'pais'. No por ta otro. De hecho, +/- 99% di e poblashon tantu na Hulanda komo na Antia ta konvensí ku nan ta 'pais'. Kon ta posibel ku tantu hende ta robes?

Bueno, tabatin un tempu ku 99.99% di e poblashon tabata kere ku mundu ta plat. Kon ta posibel ku tantu hende tabata robes riba e punto ei?

Pues, ban saminá esaki den mas detaye. Pa bo por haña rekonosementu internashonalmente komo un 'pais', bo mester 1) ta un nashon ku su propio nashonalidat, 2) ta responsabel pa bo propio defensa i 3) hiba bo propio relashonnan eksterior. E partnernan Karibense no ta kumpli ku niun di e kriterionan akí. Pues nan no por ta un 'pais'.

Ku nan ta teritorionan aparte, ta sigur. Pero e solo echo ei no ta pone ku nan ta 'pais'. Pakiko Statút mes ta yama nan 'pais' anto? I sí Reino ta un federashon, di kon Statút no ta yama nan 'estadonan federal' anto?

Bon pregunta. Nos no sa e kontesta. Por ta kisas pasobra na aña 1954 Antia i Sürnam tabatin e ambishon pa bira 'pais'?

Por ta ku despues di guera mundial Hulanda ta-

bata kier a konvensé Asamblea General di Nashonnan Uní ku Antia i Sürnam a risibí 'outo-gobernashon kompleto', di moda ku Hulanda lo a keda aliviá di su obligashonnan konforme artíkulo 73 di Statút di Nashonnan Uní?

Quién sabe? Echo ta ku Aruba, Kòrsou i San Martin, no ta 'pais'. Antia tampoko no tabata un pais. Te aña 1975 Sürnam tampoko. Na e aña ei Sürnam a risibí su independensia kompleto i for di e momentu ei en bèrdat Sürnam a bira un 'pais'. Pero promé ku esei, Sürnam tambe tabata algu, pero sigur no un 'pais'.

Nos islanan tampoko nunca a risibí 'outo-gobernashon kompleto' den sentido di artíkulo 73 di UN Charter. Loke nan a risibí na 1954 tabata 'un kantidat generoso di outonomia'. Aki no mester komprondé e palabra 'outonomia' den su sentido internashonal di 'independensia di un pais'. Nò. Tin un wega di palabra aki. Den lei Konstitushonal Hulandes e palabra 'outonomia' ta nifiká un derecho di outo-gobernashon i outo-regulashon limitá, ku e gobièrnu

nashonal ta laga gobièrnunan di entidatnan lokal (manera provinsia i munisipionan) ehersé.

Pues e palabra internashonal 'outonomia' i e palabra Hulandes 'autonomie', ta nifiká dos kos distinto. Loke nos islanan a risibí na aña 1954 tabata un kantidat generoso di 'autonomie'. Generoso, si nos ta komparé ku provinsianan Hulandes. Pero na hopi manera i riba hopi tereno e gobièrnu nashonal (lesa: Hulanda), semper a mantené kontrol.


Komo sea, dia nan a skirbi Statút, e meta tabata pa konstituí un federashon. Bo ta komprondé awor di kon e meskla di nos a sali un kos bruá?

Kon por kambia e kos bruá di nos pa e bira un federashon puru? Wèl, mester kambia i re-inventá Statút.

Kambia dor di inkluí artíkulonnan nobo den Statút pa duna e partnernan Karibeño influensia direkto den polítika Hulandes. Ta sugirí pa duna kada isla 2 asiento den Parlamento Hulandes ('Tweede Kamer', di 150 asiento) i 1 asiento den Senado Hulandes ('Eerste Kamer', di 75 asiento).

Re-inventá dor di instituí Korte Konstitushonal mesora. Tambe mester indiká den Statút klaramente ku Reino Hulandes ta un federashon. I ku pa e motibu ei Korte Konstitushonal tin ku interpretá e artíkulonnan di Statút i di leinan di Reino konforme e sistema federal.

Ademas mester re-eksaminá henter Statút krítikamente pa determiná kua artíkulonnan mester kambia òf skrap pa di e forma ei krea un federashon koherente i konsistente.




**Siguridat ta e Medio entre
Desepshon y Malkomprondementu.**

MONCHI & TONCHI

James Kroon no ta hasi wega. E ta piska pisá den awa dje kranchinan.

Awèl sí. Ela piska te asta piskadó. Pues no solamente piska 'vis', sino piska 'visser' tambe.



KOLOFÓN

**Editor Bonaire
Communication
Services N.V.
Kaya Irlanda 12,
Tel. 717-8482**

E-mail:

extrabon@gmail.com

Wèpsait:

www.extraboneiru.com

Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcendencia

Redakshon
Papi Antoin
Davienuska Janga
Velli Gijsbertha
Edson Pietersz
Ibi Piar (deporte)

Partner na Aruba
Awe Mainta

Partner na Kòrsou
Extra

Layout
Davienuska Janga
Maya Beaumont

Konsehero:
Bòl Antoin
786-6818
Aviso
avisobon@gmail.com

Segun Adolfo Morales:

Falta di spesialisismo den matamentu di baka

KRALENDIJK – Kunukero Adolfo (Popo) Morales ta sinti falta na Boneiru di spesialisismo den matamentu di baka, pa ta mas eksakto, den separashon di e diferente partinan despues ku mata e animal. Pues hende ku por saka e lomito, t-bone i otro sortonan di ‘steak’ for di e baka. Den e programa Aktualidat na Bonaire.tv Morales a trese e punto aki dilanti.

Anteriormente e aña aki Morales i algun otro kunukero a kumpra basta baka na Kòrsou. Nan ta mira posibilidad pa produsí karni di baka, pero nan ta sinti falta di spesialisismo den prosesá òf separá e karni despues ku a mata e baka.

Merkado

Morales: “Informashon ku mi tin ta ku na Boneiru tin merkado pa 4 mil kilo di

karni di baka pa dia. Esaki ta enserá ku mester mata 10 pa 12 baka tur dia. Asina nos por eliminá importashon kompletu di karni di baka. Si por yega na e kantidat aki ta un pregunta ku mi no por kontestá.”

Anteriormente e aña aki Morales i algun otro kunukero a probechá di un dil pa kumpra baka na Kòrsou. Te ku Boneiru, ku tur gastu di transporte, un baka a sali 900 dòler. Pero pa kria baka na Boneiru no ta asina fásil. E problema prinsipal ta kuminda pa e bestia.

Morales: “Un fardo di hoi importá for di Hulanda ta kosta 28 dòler awóraki. Hoi prosedente di Venezuela ta kosta hopi mas barata. Último ku a importá hoi for di Venezuela un fardo di hoi tabata kosta 5 dòler. Pero despues ku frontera ku Venezuela a sera nos a kuminsá dependé solamente di hoi di Hulanda, ku ta impagabel.”

Opstákulo

Tin sinembargo un op-

stákulo grandi den krio di baka na Boneiru. Tin nesesidat di hende spesialisá pa saka e diferente karni i partinan di un baka. “Awor nan ta mata e baka pa bo i entregá e karni den blòki. Esei no ta profeshonal.

Tin mester di hende ku por saka por ehèmpel t-bone steak si, lomito etc. No tin e hendenan aki ta matadero. Mi ta spera ku ora e matadero nobo habri lo tin e spesialisismo aki. Mi a konsehá nan tambe pa hasié. Esaki lo stimulá mas hende pa bai kria baka.”

Di akuerdo ku Morales, pa alimentá su bakanan e ta eksperimentando ku 7 tipo

di yerba den su kunuku. Ta den e direkshon ei mester bai, mirando e oumento di preis di hoi importá. E ta spera ku pronto frontera ku Venezuela lo bai habri, poniendo ku atrobe lo por importá hoi for di e pais ei. Lo ta un alivio grandi pa kriadónan di bestia.

Den pasado LVV tambe a yega di importá simia di yerba for di eksterior. Por ehèmpel ‘buffelgras’.

Den añanan kuarenta Boy van der Ree a importá simia di yerba tambe pa planta den plantashi Washington pa alimentá su baka i kabritunan.



Foto saká resientemente den un kunuku na Rincon kaminda tin krio di baka.



Bakanan importá for di Kòrsou pa algun kunukero anteriormente e aña aki.

Hopi atenshon pa Nos Zjilea

KRALENDIJK -- Dja-sabra tabatin otro edishon di Nos Zjilea na Mangasina di Rei. E tema di e dia tabata 'Nos Kultura'. A presentá diferente yerba medisinal i a duna presentashon kiko e yerbanan ta yuda na kurpa di e ser humano.

Putu luango ta un di e yerbanan ku a hala mas atenshon riba e dia. Aparte di dje a papia tambe di basora kòrá, stromestrok, shoshori, tur ta mata ku ta usa momentu un hende tin habrimentu di barika, kram

i mas doló.

Por a purba diferente djus di yerba durante e aktividat i tende pa kiko nan ta yuda hende. Tambe por a purba diferente djus fresku i esun spesial tabata djus di shimaruku ku tabata bai manera pan kayente. Por a komprondé ku ta mashá dushi.

Manera semper tabatin diferente stènt ku ta bende kuminda i sòpi, kombiná ku músika bibu. Ambiente tabata bon manera semper hendenan a komentá.





Rijksdienst Caribisch Nederland

VAKATURA

Bo tambe ke traha pa RCN?
Bo por solisitá pa e siguiente funshonnan:

JICN - Hefe Sekshon di Kuido Forénsiko (FZA)

P-direkt - Kolaboradó Sentro di Kontakto

BCN - Inspecteur der Belastingen

VNACS - Kolaboradó di Maneho Senior Ofisina Kòrsou


Mas informashon?

Bishitá www.rijksdienstcn.com/vakatura

Bubuchi den paso di Bruchi

KRALENDIJK – Bubuchi Janga a disidí di sigui den paso di su tata Bruchi. Fransisco Giosinto Janga (Bruchi) tabatin barba i su yu Fransisco jr., Bubuchi, tambe awor a laga su barba krese. Fincho, ruman di Bruchi, tambe tabatin barba largu.

Tantu Bruchi komo su ruman Fincho tabata konosí



pa nan barba. Esaki tabata manera nan ‘trademark’. Den arena polítiko e barba di Bruchi hopi biá tabata tópiko di diskushon. Bruchi

tabata pa hopi aña lider di Partido Obrero Boneriano (POB). Fincho tabata un konosido musikant, tokadó di mandolin, aktivo por

ehèmpel den ‘Los Diagonales’ di Rincon.

Tin hende ta pretendé ku mester mira e desishon ku Bubuchi a tuma pa laga su

barba krese komo protesta kontra e forma kon gobièrnu a atendé último tempu ku selebrashon di ‘Dia di Rincon’.

Haña mi falta, pero lagami bai, mi a yega final di e kaminda, solo a baha pami. Mi no kier pa ningun hende yorami, no yora un alma ku ta liber. Sintí mi falta pero no pa hopi largu. No desèspérá.

Ku hopi tristesa pero conforme ku boluntad di Dios, nos ta partisipá fayerismentu repentino di

Verònica Coffie

mihó konosi komo ‘Vera di Manuel Portuguès’ ‘Omachi’ na edat di 87 aña.

Na nomber di su yunan ku ela stimá

Harry Coffie i famia
Conny Ferreira i Raymond Pop
Manuela ‘Ella’ Ferreira

Nietu-i nietanan stimá

Sherry-Lou Coffie i famia
Christopher Bernabela i Jacqueline Soleana
Jairziñho Bernabela
Ibraim Theodora i Deandeley Martosoewiknjo
Samantha Ferreira

Bisanietunan stimá

Jamy-one Coffie
Jayden Bernabela
Zinjo Jr. Philips

Rumanan stimá

Raquel v/d Ree
Abraham ‘Bram’ Coffie
Ilse ‘Ichi’ Coffie
Hilda Coffie

Subrinu(a)nan stimá:

Kenny Thodé rumannan i famia
Julio Coffie i famia
Albert Coffie i famia
Joamine Villanueva i famia
Andre ‘Panki’ Chatlein rumannan i famia
Sabina Winklaar rumannan i famia
Natula Coffie i yunan
Marsha Schenker rumannan i famia
Audrey i Carl Lew Yen Tai i famia

Primu- i primanan:

Walter Coffie rumannan i famia
Hermogenes ‘Momo’ Coffie i famia
Chechi Martis i famia
Editha Martis i famia
Agnes Coffie rumannan i famia na Puerto Rico (USA)
Regina Pourier rumannan i famia
Jane Kock na Aruba
Ruby Wever i famia
Theo de Jongh i famia
Ilva St. Jago i famia

Kuñá:

Custodia Rosaria Ferreira i famia na Madeira

Ahijado: Kenny Thodé

Yunan sin doló:

Nando i Lucia Bernabela
Pepel de Palm
Quinton Marchena
Jeffrey Linkers

Tur su bon bisiña nan y konosirnan:

Dorothea St. Jago i famia, Feliciano da Silva Piloto rumannan i famia, Anton Burleson i famia, Ilse Vis i famia, Tico Cicilia i famia, Edelda i Rafael Rodriguez, Jesus Camacho, Vernon i Yvonne Hermelijn, Clara i Alex Statie i famia, Mr. & Mevr. Lammers i famia, Marie Domacassé, Elia i Bubui Thodé i famia, Daniela ‘Nena’ Gustowski i famia, Rosita Toppenberg i famia, Ifna Helmeijer i famia, Marco i Edseline Thodé i famia, Gina Chirino i yunan, Byron Tromp, Wina Angela i famia na Aruba, Rita i Hose Booi i famia, Mitchell Coffie, Voca Eckmeyer i famia na Aruba, Marie Domacassé i famia, Shahaira Leiyne i famia i Nana Daal i famia

Su Pets nan stimá

Cokita, Bobby, Chukulati i Chòmpi.

Demas famia:

Coffie, Ferreira, Bernabela, Theodora, Pop, Martosoewiknjo, Soleana, Thodé, Winklaar, v/d Ree, Chatlein, Villanueva, Abreu, Panneflekk, Wong Loi Sing, Martijn, Scharbaai, Pandt, Sint Jago, Pourier, De Jongh, Wever, St. Jago, Roberts, Neuman, Lieuw, Schenker, Rijke, Maduro, Seraus, Lew-Yen Tai, Van Arneman, Molina, De Jong, Janga, Crestiaan, Domacasse, Guttenberg i Philips. Na nómber di miembronan di VPGB Playa i Rincon.

Si den tristesa nos por a lubidá algun famia, amigu- ó konosi, nos diskulpa pa esaki.

Akto di entierro ta tuma lugá djasabra 5 novèmber na Parke Tului.

Ta risibi bishita di kondolensia di 9’or di mainta na Parke Tului i pa 11:30 (mitar di 12’or) tin un sirbishi despues pa Kerkhof na Playa.

Famia ta pidi pa asisti na trahe alegre.

PA MOTIBU FUERA DI ALKANSE NO POR RISIBI BISHITA DI KONDOLENSIA DESPUES DI ENTIERRO.



KÒRSOU

Detenshon relashoná ku maltrato, menasa i destrukshon

WILLEMSTAD -- Djadumingu 30 di òktober 2022 sentral di polis a risibí informashon ku tin un hòmer ta maltratá su pareha na un estableimentu riba F.D. Rooseveltweg.

Na yegada di e unidat, a topa ku un dama ku leshon na garganta, nanishi i pechu.

E dama a konta polis ku durante di un diskushon ku su pareha esaki mester a

menas'é ku morto, maltrat'é i destruí su blusa.

Durante e maltrato di e dama personanan ku tabata na e sitio lo mester a sali na defensa di e dama i a kuminsá bringá ku e hòmer

aki.

A konsekuensia di esaki e hòmer aki a sufri leshon na altura di su wowo.

Na e sitio a detené e hòmer sospechoso R.F.J.M., nasé na Kòrsou di

34 aña di edat, relashoná ku e kaso ariba menshoná.

A presentá e sospechoso dilanti di un fiskal ouksiliar ku a ordená su enkarselamentu pendiente di mas investigashon.

Detenshon relashoná ku violensia relashonal

WILLEMSTAD -- Djasa-bra 29 di òktober sentral di polis a risibí informashon ku tin un hòmer ta maltratá su pareha den un pikòp riba Damweg.

Na kaminda pa e sitio e unidat polisial a señalá e pikòp pará kan-

tu di kaminda/krusada St.Michielsweg/Hofweg. Banda di e pikòp e patruya ta topa e pareha den un pelea ku otro.

A detené e pareha komo sospechoso di maltrato i destrukshon. Ta trata e hòmer sospechoso J.V.C.

nasé na Haiti di 32 aña di edat i e dama sospechoso C.C.L.R. nasé Venezuela di 37 aña di edat.

A presentá ámbos sospechoso dilanti di un fiskal ouksiliar ku a ordená nan enkarselamentu pendiente di mas investigashon.

Detenshon relashoná ku kaso di tiroteo

WILLEMSTAD -- Kontinuando ku investigashon relashoná ku kaso di tiroteo ku a tuma lugá dia 29 di òktober 2022 na altura di rotònde di Palu Blanku a detené un sospechoso mas. Djasa-bra 29 di òktober 2022 alrededor di 13.50'or, e

hòmer S.A.P. nasé na Kòrsou di 24 aña di edat a mèldu su mes na ofisina di reshèrshi relashoná ku e kaso ariba menshoná. A presentá e sospechoso dilanti di un fiskal ouksiliar ku a ordená su enkarselamentu pendiente di mas investigashon.

Kaso di tiroteo ku un herido

WILLEMSTAD -- Djadumingu 30 di òktober 2022 alrededor di 00.24'or, sentral di polis a risibí informashon ku na un kas na Kaya Maria F. Pietersz-

Lacle lo tin un diskushon familiar fuerte tumando lugá. Un ratu despues Sentral di Polis ta risibí un otro informashon ku lo a tende zonido(nan) di bala prose-

dente di arma di kandela na sitio.

Relashoná ku e kaso aki, a dirigí un unidat polisial na e adrès ariba menshoná. Na yegada di e pa-

truya a bin topa marka nan di sanger den kurá di e kas. Na momento ku polis tabata hasiendo investigashon na e sitio a dreña otro informashon ku un hòmer a

mèldu na sala di emergensia di CMC ku herida(nan) di bala. E vehíkulo den kual e víktima a yega CMC a wòrdu konfiská pa mas investigashon.

Dos detenshon relashoná ku kaso di asesinato

WILLEMSTAD -- Relashoná ku un kaso di asesinato ku a tuma lugá dia 29 septèmber 2022, tim di kasonan di Homisidio, huntu ku tim di Aresto i UST, a hasi dos detenshon. Djamars 1 di novèmber 2022 entre 05:12or i 05:30or di mainta a hasi detenshon di

e dos hòmernan sospechoso. Ta trata di e hòmernan, J.R.L., i E.R.L., ámbos nasé na Kòrsou di 21 aña di edat. E detenshonnan a tuma lugá den área di Dominguito i Steenmijn. Despues a hasi tres entrada hudisial na e dos adrèsnan ariba menshoná i tambe na

un adrès den Noord Zapateer. A haña i konfiská un vehíkulo, arma di kandela ku vários munishon, telefon i plaka kèsh. A presentá ámbos sospechoso dilanti di un fiskal ouksiliar ku a ordená nan enkarselamentu pendiente di mas investigashon.

**Pa info i komunikado den
Extra/BONERIANO**

mail:

extrabon@gmail.com

Pa aviso mail:

avisobon@gmail.com

Impresionante su crecimiento y unda sushinan aki lo bay

Dump di Parkietenbos lo cera dentro di 61 dia

ORANJESTAD -- Dump na Parkietenbos lo wordo cera dentro di 61 dia, segun Minister di Medio Ambiente Ursell Arends a sigura na varios ocasion pero sin duda henter pueblo ta sperando e solucion “nobo” cu gobierno lo introduci pa procesa sushi di cas. En realidad tin hopi actividad tumando lugha riba dump na Parkietenbos, no solamente e ta un lugha pa procesa desperdicio cu ta sordo recogni pa Serlimar of ta wordo treci eynan pa

ciudadanonan, pero henter e cero di sushi, tambe ta un sitio cu pa hopi hende a bira un sitio di haci negoshi.

Hopi hende riba sero di sushi aki, buscando loke nan por bende, loke nan por drecha, buscando kico nan por uza ainda den otro tipo di negoshi y por mira hopi movecion tanto di auto como di hendenan cu ta canando na pia pa mira ki di nobo nan por pasa man pa nan y haci algo util di loke a wordo tira afo.

Sinembargo ta keda impresionante cu e sero aki di sushi, a crece di e forma cu el a crece, confirmando cuanto desperdicio ta ser hiba e dump na Parkietenbos, cu na mes momento ta duna un bista cla di cuanto desperdicio lo tin cu move pa otro sitio.

Sea cu esaki ta bira pa un negoshi priva of a haya un otro sitio pa esaki, ta dificil pa kere ainda cu lo move toneladanan di sushi pa un otro sitio ya cu dificilmente por kere cu tur e

sushi aki por wordo procesa den un forma cu e no ta crea incomodidad pa un of otro bario.

Segun gobierno lo tin un acuerdo caba c’un compania priva pa procesa e sushi di cas y na mes momento Minister Arends ta den un confrontacion serio cu hospital con lo atende cu desperdicio di e centro medico aki, caminda ya e mandatario a exigí di gerencia di hospital pa nan mes atende cu nan desperdicio pa medio di un incinerator. Pues

prome di November a resta Minister Arends y gobierno solamente dos luna mas pa soluciona e asunto di dump, caminda a sigura habitantenan di e bario cu definitivamente e dump lo cera pa fin di aña. Con lo sigui atende cu a masa di sushi aki, na unda loke e compania priva lo deposita e desperdicio cual no por wordo procesa of uza pa algo positivo, no ta conoci ya cu e unico cos sigur aworaki ta declaracion di Minister Arends.

Arma di candela bou di comunidad ta alarmante

ORANJESTAD -- E presencia di arma candela den comunidad ta alarmante. Esaki ta algo cu autoridadnan a expresa na diferente ocasion. Sin haci un control riguroso mes ta topa cu arma, corda si autoridadnan tene accion manera a sosode algun luna atras. Den fin di siman cu ta tras di lomba, a confisca dos arma di candela.

No mester lubida cu e posesion so di arma di candela, por haya un castigo di un aña y mey den prizon. Pues unabes cu e detencion tuma lugha, ta keda deteni te ora cu e caso bini dilanti. Asina por ehempel, esnan deteni e aña’ki lo no por celebra Pasco ni cambio di aña pafo den libertad.

E prome caso di arma di candela confisca tabata diasabra ultimo. E dia ey rond di 11.30 di mainta a presenta na Warda di Polis San Nicolas un homber, kende a conta un susto cu el a pasa aden. Prome un mata tras di su cas a sucumbi y a cay riba e dak di su cas.

Mesora el a dicidi di coy un trapi y subi e dak pa haci un evaluacion di e daño cometi. Pa su sorpresa di biaha el a mira un arma di candela color preto. Pa e motibo aki el a dicidi pa di biaha yega Warda pa bati alarma. E no tabata ni kier a mishi cu e arma aki.

Polisnan a bay na e sitio y en berdad a topa cu e arma riba dak di e cas den Bernhardstraat. A confisca

e arma y a pone e departamento tecnico di polis na altura di e hallazgo aki.

E di dos incidente di arma di candela a tuma lugha diadomingo den oranan di marduga ora cu polis a dicidi di control un vehiculo cu personanan conoci di nan tabata den dje. Patruya di Polis tabata riba parkeerplaats banda di Lekker y My Fitness na Palm Beach, ora cu nan a mira un auto particular Nissan color shinishi pasa banda di nan.

Hopi lihe a constata cu un conoci di nan, di inicial B sinta tras di e stuur (auto banda drechi). E caso a bira sospechoso ora cu a mira mas conoci di nan den e vehiculo. E dos conocinan di Polis y Husticia di inicial

F. Y G., tambe tabata den e auto. Mirando cu e tres homber aki no solamente ta conoci di husticia pero ta wordo considera “vuurwapengevaarlijk”, a dicidi di duna nan señal pa para y tira un control riba nan. E chauffeur a para e auto net dilanti un cas un poco mas leu. Pero ora cu e Polisnan a baha for di nan vehiculo, a nota cu e homber di inicial G., a habri e porta banda robes y a core bay abou. Un di e polisnan mesora a inicia un persecucion na pia y banda di e sede di Total Finance a logra gar’e.

Mientrastanto, e dos otro agentenan yegando cerca di e auto a haya holo fuerte di marihuana. A pone e otro dos contra e auto pa listra

nan pa marihuana. Esun na stuur a bisa cu no tin nada ilegal den e auto y a laga e polisnan listra. Pero e Polisnan a bin topa cu un arma di candela, Glock, color preto, bou di e asiento di e pasahero na banda. Esey tabata caminda e homber di inicial G, tabata sinta.

A dicidi di detene tur tres mientras cu funcionario di Bureau Forensische Technische Onderzoek a wordo yama pa haci nan investigacion. E arma color preto, cu bala cayente den dje, a wordo poni den man di personal di BFTO pa mas investigacion, mientras cu a hiba e sospechosonan Warda di Polis na Shaba. Nan a keda deteni e momento ey pa mas investigacion.

Siman di “Festival di Buki pa Mucha” ta inicia otro siman

“Stimula nos muchanan for di chikito pa nan lesa”

ORANJESTAD - Otro siman dia 4 di november ta tuma lugha apertura di “Festival di Buki pa Mucha” y e aña aki ta celebrando 30 aña. Prome Minister Evelyn Wever-Croes ta invita henter comunidad pa sigui e actividad cu lo tin a traves di medianan social y pa

bishita esaki cu e muchanan pa nan siña di e importancia pa lesa.

Prome Minister Evelyn Wever - Croes a splica cu ta importante pa inculca den nos muchanan desde chikito caba con importante e ta pa nan lesa y pa como adulto yudanan lesa. “Ora

bo lesa, un mundo grandi ta habri pabo, bo ta bishita luganan cu otro forma bo no ta bishita y bo ta conoce hopi cos den bida cu di otro forma bo no ta logra conoce.

Ban stimula nos muchanan di chikito, pero na grandi tambe, pa nan

lesa mas hopi cu ta posibel.”

Finalmente, Prome Minister Wever-Croes a gradici cada persona cu ta haci e Festival di Buki pa Mucha posibel un biaha mas, especialmente e ekipo dinamico na Biblioteca Nacional di Aruba, sra. Astrid Britten y

sra. Zetsia Ponson y henter e team.

“Danki pa hacie posibel cu nos por gosa fisicamente hunto di e Festival di Buki pa Mucha.

Ohala cu tur scol por duna nan aporte pa asina cada scol por celebre na su forma.”

ARUBA

Reunion regular cu CAFT pa atende e puntonan di supervision financiero

ORANJESTAD -- Recientemente Minister Maduro a tene un reunion regular cu CAFT pa atende e puntonan cu e supervision financiero di Reino Hulandes ta trece cune pa Aruba. Riba agenda tabata tin e Cambio di Presupuesto 2022, Presupuesto 2023, Landspakket, Gastonan di Cuido y Impuesto. Na comienso tambe a combersa riba e desicion di Consejo di Minister di Reino pa no duna Aruba un 'Aanwijzing'. Aki ta sigui un bista di e topiconan trata.

Conforme e ciclo presupuestario, Gobierno a presenta un Cambio di Presupuesto 2022 na Parlamento.

Un par di luna atras ya caba Gobierno a informa Parlamento di e cambionan aki por medio di un 'Nota di Fin di Aña' den cual a indica ta cual ta e cambionan cu ta wordo proponi y den cual ta resalta cu e deficit ta wordo reduci di 148 miyon florin pa 127 miyon florin. Manera conoci e deficit aki lo wordo reduci mas y lo yega bou di 113 miyon. E ultimo aki despues cu riba nivel 'bestuurlijk' a keda acorda cu e deficit pa aña 2022 mester wordo reduci mas pa asina evita un 'aanwijzing' manera CAFT a conseha.

Durante e reunion Minister Maduro a toca e tema

tambe di e instruccion 'Aanwijzing' cu CAFT a conseha Consejo di Minister di Reino RMR pa duna Aruba pa nos haci cambio na Presupuesto 2022. Riba e mesun dia cu a reuni cu CAFT, RMR a tuma decision pa no duna Aruba e instruccion eynan. Di banda di Aruba tin un proceso caba ta tuma luga pa haci cambio na Presupuesto 2022 den cual ta tene cuenta cu mayoria conseho di CAFT y ya ta reduci e deficit grandemente. Na un punto aki tambe e mandatario a pidi CAFT pa trece claridad, ya cu te ainda e no ta conoci ta cual ta e cifra di deficit cu CAFT ta opina cu ta esun cu Aruba lo ta permiti pa por tin den aña 2022. E ultimo aki ta masha importante ya cu henter e discusion riba e 'Aanwijzing' pa Aruba tabata dirigi riba con grandi e deficit lo por ta pa aña 2022. Falta di claridad riba e punto aki tambe a pone cu RMR no a duna Aruba un 'Aanwijzing'.

Minister Maduro a informa CAFT cu Presu-

puesto 2023 a keda entrega na tempo y ta cla pa wordo trata pa Parlamento. A presenta un concepto cu un deficit di 25 miyon florin, pero e mandatario a informa cu Gobierno lo presenta un 'Nota di Cambio' cu ta reduci e deficit aki mas y cu kizas lo por yega na un presupuesto balansa pa aña 2023. Depende con economia bay otro aña, lo por spera hasta un surplus chikito na fin di aña 2023.

Otro topico nan cu a wordo trata den e reunion cu CAFT tabata e reforma den cuadro di e Landspakket, riba tereno di AZV y di Impuesto. E mandatario a informa cu e trabounan pa Landspakket ta bayendo hopi bon y cu recientemente Minister President tabata na Parlamento cu tur 'trekkers' pa brinda informacion amplio riba e trabounan haci. Pa locual ta trata AZV, e mandatario a referi na e presentacion detaya cu CAFT a haya di AZV den cual ta splica e cambionan haci. Riba e tereno di impuesto Minister Maduro

a splica cu e introduccion di BTW na luga di BBO a wordo temporisa debi na falta di sosten politico induci pa e preocupacion pa e inflacion creciente. E mandatario a splica cu pa atende cu e realidad financiero a dicidi pa un 'Plan di Impuesto 2023' den cual ta tene cuenta cu subida di entrada y compensacion pa e situacion di inflacion. Minister Maduro a splica cu a pidi IMF y Banco Mundial pa yuda Gobierno atende cu e dos criticanan mas fuerte dem comunidad contra introduccion di BTW na Aruba, cual ta 'compliance' y 'baha gasto di Gobierno prome'. Hunto cu IMF lo traha un plan pa mitiga 'leakages' den e sistema di impuesto y hunto cu Banco Mundial lo kier traha riba un 'Expenditure review' den cual na forma detaya ta repasa e gastonan di gobernacion di Aruba. Di e manera aki tur hende por ta adecuadamente informa y e debate politico y supervision financiero lo por cana miho na bienestar di Aruba.



STATIA/SABA/ST. MAARTEN

Hopi interes pa skèn kanser na pechu

ST. MAARTEN – Na e evento di komunidat di skèn pa kanser na pechu, American University of the Caribbean School of Medicine (AUC), den kolaborashon ku Positive Foundation i e ministerio di salubridat públiko, desarojo sosial i labor, a tene un eksitoso evento grátis di skèn pa kanser na pechu.

E evento ku a tuma lugá dia 22 di òktober, tabata e segundo di e di tres evento pa e aña akí, ku e evento final pa 2022 programá pa 26 di novèmber.

Mas ku un dozein di studiante di AUC, bou di supervishon i kompañeronan di medisina klíniko, a proveé 31 hende muhé ku evaluashon general di salú.

Te ku awe, kasi 550 hende muhé a keda saminá pa Dòkter Chobanyan i su tim di medisina klíniko i studiantenan. Kada evaluashon ta inklui tambe un eksámen klíniko di pechu dor di Dòkter Naira Chobanyan, onkólogo klíniko i profesor di medisina klíniko na AUC.

E skèn di pechu a kuminsá na 2017 pero a keda posponé debí na orkan Irma i e pandemia di Covid-19. E proyekto ta pa oumentá konsientisashon públiko di kanser na pechu miéntras ta inklui tambe data nesesario.

Lo reportá resultado di e proyekto na ministerio di salubridat públiko pa yuda establese pólisanan lokal pa skèn di pechu.



Agènda kultural di Statia

STATIA – Un delegashon di ministerio di edukashon, kultura i sien-sia, aktualmente ta na Statia pa diskutí e agènda kultural pa e isla.

Durante e enkuentronan ku gobièrnu lokal, lo diskutí tópikonan amplio pa loko ta trata e patrimonio kultural, inklusive fondo i kordinashon.

E bishita ta sigui e firmamentu di e kombenio kultural luna pasá entre Sekretario di Estado di kultura i media, Gunay Uslu i gobièrnunan lokal di Boneiru, St. Eustatius i Saba.

Basá riba e kombenio akí, ta rekerí pa prepará un agènda di implementashon pa término kòrtiku, medio i largu.



Djabièrnè 21 di òktober studiantenan di MAC - BFM Campus, a bishitá e departamentu meteorológiko di St. Maarten. Durante e bishita e studiantenan a risibí hopi informashon balioso pa loko ta trata tur loko tin di aber ku wer.

HULANDA

Wòlf ta mata 32 bestia

HULANDA – Wòlf-nan na sèptèmber a mata por lo ménos 32 bestia na Drenthe. Esaki a sali na kla for di sifranan temporal di BIJ12, ku ta atendé daño okashoná pa wòlf den e provinsianan.

Ku esaki Drenthe ta e provinsia ku e kantidat mas haltu di notifikashon di atakenan di wòlf na Hulanda.

BIJ12 a registrá na Friesland na sèptèmber seis kaso, na Brabant sinku i na Limburg unu.

Aparte di karné, wòlf-nan a mata na Drenthe na sèptèmber tambe un biná, dos baka i tres porko. Dos di atakenan riba bestia den e provinsia riba bestia, ainda no ta kla ku ta trabou di wòlf, RTV Drenthe ta skirbi.



Despues di investigashon úniko di dna

Kuater aña prizòn pa kaso di moralidat

HULANDA – Un hòmbler di 28 aña mester sinta kuater aña den prizòn pa violashon di un muhé di 76 aña, tres aña pasá den e área di natu-

rales na Schipborg na Drenthe. E sentensia ta sigui un método nobo importante di investigashon di dna.

E abogado di e hòmbler

e argumentá ku e dna riba paña di e víktima por ta mas bien tambe di e hòmbler ohochi di su kliente.

Dna di e rumannan ta parse hopi riba otro, pero

despues di un investigashon amplio parse ku e material di dna riba e paña tòg realmente ta di e sospechoso di 28 aña.

E kastigu ta mas haltu

ku e demanda di tres aña di Ministerio Públiko.

Segun RTV Drenthe, Korte e tene hopi na konsiderashon e edat di e víktima.

Ofisina di polis chines mester sera mesora

HULANDA – Ofisinanan di polis chines na Hulanda, ku a keda lantá sin konosementu di gobièrnu hulandes, mester sera nan porta di inmediato. Esaki Minister Wopke Hoekstra di asuntunan eksterior, a disidí djamars. E ta haña e

ofisinanan akí inaseptabel.

E ofisinanan di polis chines no solamente lo mester ta regla asuntunan atministrativo pa chinesnan ku ta keda na Hulanda, manera prolongashon di reibeweis.

RTL i FTM, ku resiente-

mente a informá tokante presensia di e ofisinanan akí, a bisa ku tin indikashon fuerte ku ta usa nan tambe komo stashon di servisio pa tene chinesnan krítiko na Hulanda na bista i posiblemente por nan bou di preshon.



Demanda di sinku aña pa abuso di yu

HULANDA – Pa abusá di su yu menor di edat den un relashon sadomasohista, Ministerio Públiko a demandá sinku aña di prizòn pa Patricia B. di 41 aña i su amante Gilbert B. di 49 aña

di Wassenaar.

E abuso mester a tuma lugá den e periodo di 2014 te 2017 na Beilen, Wassenaar. E mucha muhé tabatin ocho aña tempu ku e abuso a kuminsá.

Ámbos ta será desde febrüari, despues ku e mucha muhé tres luna promé a hasi denunsia di abuso seksual dor di su mama i su amigu. E pareha a desmentí ku nan ta enbolbí den

un relashon sadomasohista ku nan yu. E muhé a saka foto di su yu sunú pa dun'é plaser. “Esaki tabata un fout grandi di mi,” e muhé a bisa. Ministerio Públiko ta haña pruebá trahamentu,

tin den poder, plamamentu di porno infantil i abuso seksual di un menor di edat, dor di ámbos sospechoso.

E mama lo a hasi su mes kulpabel tambe na ofresementu di e yu.

E aña akí ya mas 50 kaso di hinkamentu

Poseshon arma bou di hubentut a oumentá

HULANDA – Segun polis e aña akí ya tin mas di 50 kaso di hinkamentu bou di hóben a tuma lugá. E mas resien ta esun di siman pasá na Hoorn, kaminda un mucha di 14 aña a pèrdè su bida debí na hinkamentu ku kuchú dor di un hóben di 16 aña.

Trahadónan ku ta traha ku hubentut ta atvertí ku poseshon di arma bou di hubentut ta oumentá, pero no ta tur hóben ku un arma ta hasi uso di dje tambe. Aparte di e mucha na Hoorn ku a pèrdè su bida siman pasá despues di un kaso di hinkamentu fatal, na Middelburg, Amsterdam, Horst, Rosmalen, Breda, Vlaardingen, Vlissingen i Nijmegen, tabatin kasonan igual. Faltando dos luna pa aña kaba, na 2022 ya taba-

tin mas ku 50 insidente.

“Desde 2019 bo ta mira oumento di poseshon di arma bou di hubentut, ku tin kasonan di insidente di hinkamentu i ku violensia ekstremo ta kresiendo,” Bianca Boender ta bisa. E ta presidente di e organisashon pa mucha i hubentut, BVjong i ta hasiendo trabou di hubentut na Zuid-Holland.

Kriminólogo Jeroen van den Broek ta rekonosé e imágen. “Ya pa algun aña nos ta mira e oumento i nos tin nos preokupashon.

Nos no por bisa ku tur hóben tin arma huntu ku nan òf tin miedu pa bira víktima.”

Ku hóbenan ta disidí pa tin un kuchú òf otro arma huntu ku nan, por tin diferente motibu, variando

di un sintimentu insegur te preshon di grupo.

Nan ta kopia serka otro nan i nan ta influensiabel. Ròlnan di modelo positivo tin un influensia positivo.

Sí bo ta den un grupo di amigu ta normal pa tin kuchú, por komprondé den e kultura i den un spiral di miedu i violensia, Boender ta bisa. E pregunta segun kriminólogo van den Broek, ta di unda e sintimentu di inseguridat ta bini. El a finalisá un investigashon tokante poseshon di arma i violensia bou di hóben na Rotterdam. “Tokante e orígen su tras ainda nos no sa mashá i mi ta pensa ku nos mester investigá esaki mas aleu.

E oumento di inkomportashon ku parse tin i problemanan di violensia i

agresividat, ta un problema amplio.” Violensia humano no ta tumando lugá tur kaminda.

E no ta limitá su mes solamente den siudatnan grandi, pero tin tambe sitionan kaminda esaki no ta tuma lugá, van de Broek ta bisa. P’esei e ta krítiko riba kampañanan ku ta ehekutá.

“For di nos investigashon a sali na kla ku prinsipalmente un grupo hopi spesífiko tin kuchú huntu ku nan.

Kampaña nashonal netamente por traha reverso.”



DEPORTE

Premiashon futbòl pober

KRALENDIJK--Tin reklamnan riba premiashon o sea e premionan ku futbolistanan ta haña despues di destaká i logra kai den premiashon di entre otro kampionato di futbòl ku a kaba finalisá ku premiashon fin di siman pasá.

E siudadano aki ta trese dilanti ku por ehèmpel AVB ta premia su hungadónan ku sapatu di oro, plata i bròns pa e futbolista di aña. Kiper di aña o sea temporada ta haña wante di oro. E habitante fanátiko aki ta sigui bisa ku esnan ku ta sinta den kantor

sin algu pa hasi, ora por anto, nan por sali bai serka komèrsiantenan i buska spònsen por ehèmpel pa duna e futbolistanan i timnan ku destaká, premionan na drechi i no kosnan fofu.

E ta sigui bisa ku hungadónan ta trein kuantu

biá pa siman, hunga tin biá 1 òf 2 biá pa siman, lesioná nan pia i rudia, anto ta haña ko’i loko komo premio. E kosnan aki ta kosta 30 pa 50\$ segun e siudadano ta bisa tokante esaki.

E ta haña ku si buska spòner ta logra haña mihó

premio pa premiá esnan ku desataká den kampionato.

Tin un aña ku por move buska spònsen i ta logra haña mihó premio pa esnan ku destaká den temporada di futbòl di nos isla. Tin hopi kompania grandi ku deseo di yuda spònsen un kampionato di futbòl.

Pero torneo na Merka a para

Tim di Rugby bon prepará

KRALENDIJK--Tin diferente deporte nbo pa nos isla ku a ranka sali pero a topa ku kontratiempo na kaminda i ku no a sigui. E deporte di Rugby si ta unu ku anke no ta tende mashá di dje aworakí, pero ku tabata den ful treinan, ful

preparashon pa un torneo na Hollywood Beach na Hollywood Florida, pero ku a keda posponé. Ta trata di un torneo ku premiashon kèsh pa tantu hende muhé komo hende hòMBER. E torneo aki tabata planiá pa tuma lugá 7 yanüari 2023.

E tim di Boneiru tabata den ful treinen, ful preparashon pa esaki pero lamentablemente e torneo no ta sigui mas pa e fecha aki. Ta pendiente pa tende ki dia e torneo aki lo sigui.

Aworakí tambe ta pendiente dje desaroyonan pa

kanchanan di deporte, pa asina sigui animá mas hende, mas atleta, pa asina nan djòin e famia di e deporte di Rugby Bonaire i hasi esaki mas grandi posibel, pa finalmente pone Rugby Bonaire riba mapa.

Keda pendiente pues ya

ku asina ku tin mas informashon tokante esaki nos lo amplia i duna publisidat tambe pa abo ta bon informá di e deporte di Rugby aki na Boneiru.

DEPORTE

Tres windsurfista a sobresalí na Merka

KRALENDIJK -- E tres hóbennan windsurfista ku a biaha siman pasá pa Merka, a regresá Boneiru e siman akí. Nan a hasi un bon trabou, ta loke Elton 'Taty' Frans, a bisa BONERIANO. Un Bon trabou e hóbennan windsurfista Nigel Hart, Bimbi Clappers i Terrence Clappers, a hasi na Merka.

Nigel Hart a sali na di promé lugá den 'Freestyle men'. Nigel, apesar ku no ta kustumbrá kore den e friu, a kore sólido i kada kontrinkante ku e mester a bai kontra dje, e tabata kore mas mihó, parse ku e friu

no a molesti'è.

Den e 'final heat', Nigel a logra gana e kanades ku tabata pa hopi tempu den e mihó tòp 10 di mundu den 'freestyle', pues esaki ta un gran logro pa Nigel i mundu pafó a kuminsá tira bista riba dje.

Den kaso di Bimbi Clappers, tabata difisil, pa su mala suerte i el a shuata despues di a kome algu aya. Esaki a sosodé nèt e dia promé ku e kompetensia di 'freestyle', esei a buta ku e no por a kompetí. Mirando e bientu ku a bira ménos e dianan despues, no tabatin chèns pa por a drecha resul-

tado.

Terrence Clappers a logra sali na di 5 lugá den 'Slalom/long distance men'. Su esfuerso pa kompetí den e grandinan i no den djuniòr ta hopi di apresiá. Aya nan a puntr'é kuantu aña e tin, pasobra su spit ta hopi haltu i pa e ta un hóbén yòn ku e spit ei ta remarkabel.

Di 5 lugá no ta malu, pero papiando ku Terrence, el a bisa: "Kos por a bai mihó," anto tòp 3 lo tabata posibel pe.

E hóbennan akí ta determiná i nan energia i esfuerso i kurashi un dia lo paga.



Pa rekordá deportistanan ku a destaká

Salon di Fama nesesario

KRALENDIJK -- "Masha dia mi ke a bin ku Salon di Fama na Boneiru. Nos a lanta un grupo ku ami, Bòi Antoin, Wincho Cristina i un mener mas, pero nan a stòp nos. Asta ayudo di Geoffrey Goede nos tabata bai haña, kon pa hink'é den otro."

Rudsel Cicilia ta skirbi.

Akeda di lanta 'Boneri-aanse Sport Federatie' (BSF) bèk, pero tambe a bai drumi un soño profundo. Di INDEBON ku ta e instansia di deporte di gobièrnu, tampoko mi no ta tende nada. Nan tambe ta na soño, Cicilia ta skirbi.

Cicilia ta sigui, un tempu Hans Els tabata diputa-

do, e ke a lanta Salon di Fama, pero e no a dura masha komo diputado.

Na Boneiru tabatin hopi deportista, dirigente i ofisial, ku a destaká tantu lokal i internashonal i ku mester ta den un Salon di Fama.

E siguiente lista pa bin na remarke:

1. Elias Bernabela

2. Rupert 'Ruby' Bal-entien
3. Ernesto 'Nechi' Wijman
4. Rudy Domacassé
5. George Nicolaas
6. Leo Domacassé
7. Gregorio 'Goito' Winklaar
8. Izaak 'Shaki' Bernabela

9. Ezzard 'Ezzy' Se-meleer
10. Aubrey 'Obs' Sealy
11. Alipio Goeloe
12. Antonio Trenidad
13. Rishi Alberto
14. Kili Vis
15. Norwin Lau
16. Edward Pourier
17. Erik van Veenendaal
18. Elio Flores

Riba aksidente ta warda?



Tin diferente sitio riba Malekon kaminda klenku a lòs. Ta riba aksidente ta warda, pa hasi algu? Un siudadano ku ta kana tur dia riba Malekon ta puntra. Ya pa seis siman e situashon ta asina i kada dia ta birando pió. A pone un pion oraño pa atvertí, pero esaki tambe a somentá.

TE KU 70% OFF*

FIN DI AÑA

UP TO 70% OFF*





HP WIRELESS PRINTER
\$75

HOT price



WIRELESS SECURITY SYSTEM
\$150

25% OFF



BLACK GLASS L-SHAPED DESK
\$169



super special

15.6" HP LAPTOP
\$495

OFFICIAL STORE 

*riba artikulonan selektá

City Shop

Smart shopping ► Better living

 Kaya International #36
 +599 717.36.66

 www.cityshopbonaire.com
 info@cityshopbonaire.com

 City Shop Bonaire
 +599 700.64.42